

Oyu peû di s'-t-ombe.

Avou m' papa nos estin' su l' vôle po r'v'nu à nossse maujone.
Nos rêv'nin' à pîds sins lampe di d'lé m' paré èt m' marène que d'meurin' al copète.
Il èstot taurd au niut po on p'tit gamin come mi di quate ou céq ans.
I fieûve fwârt nwêr èt dj'avo peû dèl nwèreû.
Li vôle èstot strwète èt gn-avot di chaque costé one aye pus grande qui nos-ôtes.
Di ç' timps là, didins on p'tit viladje, i-n-avot waîre di lampe sù lès vôyes.
Quétefiye one tos lès deûs potaus.
C'èstot l'iviêr, li vint choufleûve à r'laye èt i choyeûve lès coches dè l'aye, èle fyin' pinser à
dès brès qui voulin' vos-apêcî.

En rotant dji vèyeuve al tère padvant mi one saquî qui roteûve ossi.
I grandicheûve po dè'vnu fwârt grand. One miète après i n'èstot pus là.
En waîtant au d'zeu di mi spale, il èstot padrî mins ossi grand qu'il èstot aunawêre divant.
Dji l'a vèyu dè'vnu tot p'tit èt adon m' dépasser.
Dj'a taurdji tot coût, il a taurdji ossi.
Crè nom di dju, dj'i m' ti va spotchi avou mès pîds.
Mins ça n' lî a ré faît.
Dji ma mètu à couru, il aleûve ossi rade qui mi, sins m' lachî d'one simèle. Padvant, padrî,
dj'èsto fou d'alène mins il èstot todi la.
Dji triyoneûve dè peû èt dji m'a mètu à braîre.
M' papa n'èstot nè lon èri. Avou sès grandès djambes il a yeû rade faît di m' ratraper.
« Qwè avoz ? » di-s-ti.
« Poqwè èst-ç' què vos bréyozi insi ? »
« Dj'a peû di ç't-ome la qui m' su tot l' timps » lî a dj' rèspondu.
« N'eûchîz né peû » di-s-ti. « Cè n'èst qu' voste ombre qui vos sût . C'è-st-à cause di cès
fayéyès lampes-là sù lès potaus ».
« Donéz m' vosse mwin » a t'i dit.
Il avot one grosse mwin de cinsi bé tchôte, djè n' l'a pu lachi jusqu'à no maujone.

Li djoû d'aujourd' lès-èfants n'ont pus peû sù lès vôyes au niût.
I n' rotenèt pus à pîds, i sont todi en auto.

Michel Marius d'amon Julepierre